

दिनांक 20.06.2024

समय: 18.45 बजे

आकाशवाणी जयपुर-अजमेर  
प्रादेशिक समाचार।

- प्रदेश मांय काल अन्तराष्ट्रीय योग दिवस मनावण री तैयारी- जयपुर रा सवाईमानसिंह स्टेडियम मांय राज्य स्तर रो कार्यक्रम राख्यो जावेला।
- मुख्यमंत्री भजन लाल शर्मा कह्यो-महिलावां रो मान करण अर वां ने बराबरी रा मौका देवणो राज्य सरकार री जिम्मेदारी।
- प्रदेश मांय जनता री समस्यावां रा बेगा निपटारा सारू जिलां मांय जनसुणवाई रा कार्यक्रम।
- राज्य मांय केई ठौड़ां बायरो बाजण सागे हल्की बारिश- आवता 24 घंटां मांय जयपुर, कोटा, भरतपुर, अजमेर, उदयपुर अर बीकानेर संभाग मांय कठे-कठे बिरखा रा आसार।

अन्तराष्ट्रीय योग दिवस रे मौके राज्य स्तर रो खास जळसो काल जयपुर रा सवाईमानसिंह स्टेडियम मांय राख्यो जावेला। कार्यक्रम मांय राज्यपाल कलराज मिश्र, मुख्यमंत्री भजनलाल शर्मा, उपमुख्यमंत्री अर आयुष मंत्री डॉ. प्रेमचन्द बैरवा ई सिरकत करेला। डॉ. बैरवा आज कार्यक्रम री तैयारियां रो जायजो लीनो। विधानसभा भवन परिसर मांय ई काल संवारे 06.00 बजां खास कार्यक्रम राख्यो जावेला। इण ऊं पैली आज ई प्रदेश मांय न्यारी-न्यारी ठौड़ां योग योग ऊं जुड्या न्यारा-न्यारा कार्यक्रम राख्यी ज्या। कोटा मांय राजकीय आयुर्वेद महाविद्यालय रा विद्यार्थी जिला आयुर्वेद चिकित्सालय तलवंडी ऊं केशवपुरा चौराहा ताई **स्वयं एवं समाज के लिए योग** रा मुद्दा माथे योग रैली निकाळी। कोटा रेल मण्डल री ओर ऊं योग शिविर लगाया जा रह्या है। ई सागे ई कोटा रेल मण्डल जनता अर रेल कर्मचारियां मांय योग रा बारा मांय जाग जगावण सारू सोशल मीडिया रे जरिये, टेशन माथे उद्घोषणा कर र अर बैनर लगा र जतन कर रह्यो है। बूंदी मांय राजस्थान राज्य भारत स्काउट-गाइड री ओर ऊं लगाया जा रह्या कौशल विकास शिविर मांय व्यक्तित्व विकास अर स्वास्थ्य निर्माण मांय योग रा महत्त्व री जाणकारी दीरीजी। **पाली** मांय लोडीया पाल कने नगर परिषद कानी ऊं लगायी ज्यी योग आसन री 11 मुद्रावां री मूर्तियां रो स्वच्छता ब्रांड एम्बेसडर जगदीश माली दूध ऊं अभिषेक कर र वां ने माळा पहरायी। बाड़मेर मांय जिला स्तर रा योग दिवस कार्यक्रम मांय योग आसनां री जाणकारी देवण वाळी प्रदर्शनी लगायी जावेला। वठे जिला मुख्यालय सागे ब्लॉक अर ग्राम पंचायत स्तर माथे ई योग दिवस रा कार्यक्रम राख्या जावेला। जिला स्तर रा कार्यक्रम सारू न्यारा-न्यारा स्तरां माथे टीमां बणायी ज्यी है जद के ब्लॉक स्तर माथे नोडल अहलकार तैनात करी ज्या है। सवाईमाधोपुर जिला मांय जिला स्तर रो कार्यक्रम पुलिस लाइन परेड मैदान मांय राख्यो जावेला। ई सागे ई उपखण्ड, तहसील अर ग्राम पंचायत मुख्यालय परां ई योग अभ्यास रा कार्यक्रम राख्या जावेला। योग दिवस रे मौके राज्यपाल कलराज मिश्र जनता ने बधाई अर शुभकामनावां दीनी है।

वां रा संदेश मांय राज्यपाल कह्यो के योग भारत री महान संस्कृति है अर ओ दिन दुनिया ने भारत री महान परंपरा री जाणकारी देवण रो पावन पर्व है। वे जनता ऊं स्वस्थ तन अर मन सारू रोजीना योग ने अपना र ई महान परम्परा ने बचावण अर आगे बधावण री अरज कीनी। मुख्यमंत्री भजनलाल शर्मा ई जनता ने शुभकामनावां देता थकां कह्यो के योग रे मार्फत इंसान शरीर अर दिमाग दोन्यू तौर ऊं स्वस्थ रह सके है। वे जनता ऊं योग ने अपनावण अर दूजां ने ई ऐडो करण सारू केहवण री अरज कीनी।

विधानसभा अध्यक्ष वासुदेव देवनानी जनता ने बधाई अर शुभकामनावां दीनी है। वां रा संदेश मांय देवनानी कह्यो के योग रो मतलब ज़िदगी मांय संतुलन बणावणो है। वे कह्यो के योग खुद अर समाज बीचे संतुलन बणावण रो बेहतरीन ज़रियो है अर लोगां ने खुद अर समाज सारु योग करणो चाहिजे। योग रा महत्त्व री चर्चा करता थकां योग गुरु ढाकाराम कह्यो के योग ने जल्दी ऊं जल्दी जिन्दगी रो हिस्सो बणावणो चाहिजे।

-----

मुख्यमंत्री भजनलाल शर्मा कह्यो है के महिलावां रो मान करण अर वां ने बराबरी रा मौका मुहैया करावणो राज्य सरकार री ज़िम्मेदारी है। वे तृतीय श्रेणी शिक्षक भर्ती परीक्षा मांय महिलावां सारु आरक्षण 30 फीसदी ऊं बधा र 50 फीसदी करण रा फैसला रा सिलसिला मांय आज जयपुर मांय वां रा रहवास माथे राखी ज्या अभिनंदन अर आभार समारोह मांय बोल रह्या हा। मुख्यमंत्री कह्यो के राज्य सरकार नौजवानां ने सरकारी नौकरियां रा मौका मुहैया करावणो तैय कीनो है अर आवता बगत मांय न्यारा-न्यारा दौर मांय भर्ती परीक्षावां करा र रीता ओहदा भर्या जावेला। मुख्यमंत्री कह्यो के माली तौर ऊं खुद रे पाण ऊबी, मजबूत अर भणी- पढ़ी महिलावां आगे बधता समाज री पिछाण है।

-----

उपमुख्यमंत्री अर पर्यटन मंत्री दिया कुमारी राज्य ने पर्यटन रा हलका मांय देश अर दुनिया मांय अगाड़ी बणावण सारु अहलकारां ने ज़रूरी जतन करण रा हुकम दीना है। उपमुख्यमंत्री आज जयपुर मांय पर्यटन विभाग रा अहलकारां सागे समीक्षा बैठक मांय बोल रही ही।

वे कह्यो के राज्य मांय पर्यटन रा जूना रूप अर नुवा सुबीतां ऊं सैर-सपाटा ने बधावो मिलेगा। दिया कुमारी प्रदेश मांय सैर-सपाटा री असीम संभावनावां ने ध्यान राखता थकां रात री बगत पर्यटन ने बधावो देवण सारु सुबीता मुहैया करावण अर इण ऊं जुड़ी कार्य योजना बणावण रा हुकम ई दीना। ई सागे ई वे जयपुर अर प्रदेश मांय सैर-सपाटा री दूजी ठौड़ां रा जूना रूप ने बणायो राखता थकां सैर-सपाटा री नुवी ठौड़ां रा तौर ऊं विकसित करण रा हुकम ई दीना। वे पर्यटन विभाग ने ई साल री सैर-सपाटा ऊं जुड़ी हलचल रो कैलेंडर बणावण बाबत् ई कह्यो।

-----

प्रदेश मांय जनता री समस्यावां रा बेगा निपटारा सारु जिलां मांय जन-सुणवाई रा कार्यक्रम राख्या जा रह्या है। जालौर मांय पाली संभाग री संभागीय आयुक्त प्रतिभा सिंह जन सुणवाई कीनी। बालोतरा मांय आज ज़िला स्तर री जनसुणवाई मांय जिला कलेक्टर सुशील कुमार यादव अहलकारां ने जनता री समस्यावां रा निपटारा रा हुकम दीना। बूंदी मांय जिला कलेक्टर अक्षय गोदारा जन सुविधा केन्द्र मांय राखी ज्यी जिला स्तर री जनसुणवाई मांय जिला प्रमुख चन्द्रावती कंवर अर एस.पी. हनुमान प्रसाद मीणा री मौजूदगी मांय जनता री परेशानियां सुणी अर जनता री वाज़िब समस्यावां तुरत निपटावण रा हुकम दीना। प्रतापगढ़ री जिला कलेक्टर डॉ. अंजली राजोरिया छोटी सादड़ी रा कारुण्डा मांय रात्रि चौपाल लगा र जनता री पाणी, बिजली अर ज़मीं माथे गैर कानूनी कब्ज़ा समेत न्यारी-न्यारी समस्यावां सुणी अर अहलकारां ने समस्यावां दूर करण बाबत् ज़रूरी कार्रवाई करण रा हुकम दीना। बाड़मेर मांय जिला स्तर रा जन सुणवाई कार्यक्रम मांय ज़िला कलेक्टर निशांत जैन अहलकारां ने मौके ही समस्यावां रा निपटारा रा हुकम दीना। हनुमानगढ़ मांय ज़िला कलेक्टर कानाराम री सदरत मांय जिला अर ब्लॉक स्तर रा अहलकारां री मौजूदगी मांय ज़िला स्तर री जन सुणवाई करी ज्यी। **पाली, कोटा, कोटपुतली-बहरोड़, झालावाड़, अलवर अर केकड़ी** मांय ई अहलकार जनता री समस्यावां सुणी।

-----

सुप्रीम कोर्ट देश रा न्यारा-न्यारा हाईकोर्ट मांय कथित तौर ऊं नीट-यूजी पेपर लीक व्हेवण ऊं जुड़्या मामलां री सुणवाई माथे आज रोक लगा दीनी। नीट परीक्षा करावण वाळी राष्ट्रीय परीक्षा एजेंसी-एन टी ए री स्थानांतरण याचिका माथे सुणवाई करता थकां न्यायमूर्ति विक्रम नाथ री सदरत वाळी अवकाश पीठ रोक लगावण रा हुकम दीना। सुणवाई रे दौरान एन टी ए रा वकील बतायो के लारला सप्ताह सुप्रीम कोर्ट कानी ऊं ऐड़ी स्थानांतरण याचिका माथे नोटिस जारी करण रे बावजूद न्यारा-न्यारा हाई कोर्टां मांय नीट-यूजी परीक्षा मांय कथित गड़बड़ियां ऊं जुड़्या केई

मामलां माथे सुणवाई व्हे रही है। सुप्रीम कोर्ट स्थानांतरण याचिकावां अर परीक्षा रद्द करण री मांग करण वाळी अर्जियां माथे 8 जुलाई ने सुणवाई करेला।

-----  
 आकाशवाणी समाचार जयपुर री ओर ऊं प्रादेशिक समाचार बुलेटिनां मांय तीन नुवा आपराधिक कानूनां रा बारा मांय जाग जगावण सारु श्रृंखला चलायी जा रही है। आज पेश है भारतीय नागरिक सुरक्षा संहिता रा एक खास प्रावधान री जाणकारी। ई प्रावधान रे मुजब गर फरियादी री रपट दर्ज नी करी ज्यी हो, तो फरियादी एस.पी. ऊं सम्पर्क कर सके है जो खुद जांच कर सके है या धारा 173 (4) रा तहत मातहत अहलकार ने जांच रा हुकम दे सके है। गर एस.पी. कने फरियाद करण रे बावजूद किण ई मामला री रपट दर्ज नी व्हे है, तो फरियादी धारा 175 (3) रा तहत मजिस्ट्रेट ऊं दखल देवण री मांग कर सके है जो पुलिस रा अहलकार री दलील सुण्यां पाछे जांच रा हुकम दे सके है।

-----  
 प्रदेश मांय आज केई ठौड़ां बिरखा व्हेवण ऊं गर्मी ऊं थोड़ो आराम मिल्यो। राजधानी जयपुर मांय दोपहरां पाछे केई ठौड़ां हल्की बिरखा व्ही। आमेर मांय व्ही बिरखा ऊं सड़का माथे पाणी भर ग्यो। दौसा अर आरे-सारे रा हलकां मांय ई दोपहरां री बगत रिमझिम बारिश व्हेवण ऊं मौसम सुहावणो व्हे ग्यो। सवाईमाधोपुर जिला मांय ई जोरदार बायरो बाजण सागे व्ही बिरखा ऊं गर्मी ऊं साता मिली। करौली अर बूंदी मांय ई तेज हवा चालण सागे छांटो-छिड़को व्ह्यो। श्रीगंगानगर अर आरे-सारे रा हलकां मांय ई बिरखा व्ही।

**केकड़ी, हनुमानगढ़,** अलवर, चित्तौड़गढ़, अजमेर अर धौलपुर ऊं ई बारिश रा समाचार है। चूरु मांय आंधी चाली। ई बीचे मौसम विभाग आवता 24 घंटां मांय जयपुर, कोटा, भरतपुर, अजमेर, उदयपुर अर बीकानेर संभाग मांय कठे-कठे बिरखा रा आसार जताया है। मौसम केन्द्र जयपुर रा निदेशक राधेश्याम शर्मा केई ठौड़ां तेज अंधड़ आवण रा आसार ई जताया।

-----